

*«Մի կողմից երջանիկ մանկություն եմ ունեցել,
մյուս կողմից՝ անսովոր, որովհետև
12 տարեկանում թողեցի իմ ընտանիքն
ու տեղափոխվեցի Լիսաբոն»:*

Այլևս չկա այն անշուք հանրակացարանը, չկա երեք ննջասենյակով այն համեստ բնակարանը, որտեղ ծնվել է Ռոնալդուն: Մադեյրայի մայրաքաղաք Ֆունչալի, Սանտո Անտոնիո թաղամասի Քվինտա դե Ֆալկաո փողոցի 27Ա տունը 2007 թվականին քանդեցին, որ մարդիկ ապօրինի չզավթեն այն:

Այդ ժամանակ Ավեյրոների ընտանիքը վաղուց տեղափոխվել էր: Կրիշտիանուի մայրը՝ Դոլորեսը, այժմ ապրում է Ֆունչալի մյուս կողմում գտնվող Սան Գոնչալո թաղամասի մեծ, սպիտակ տանը, որից տեսարան է բացվում դեպի Ատլանտյան օվկիանոս: Հրաշալի տուն է, որը նրա համար գնել է որդին, եղբոր՝ Հյուգոյի և քրոջ՝ Կատյայի տների կողքին:

Սարալանջին սփռված բնակելի տներից բաղկացած երբեմնի աղքատ Քվինտա դե Ֆալկաոն Եվրոպական Միության ներդրումների շնորհիվ վերջին տարիներին փոխվել է:

Կառուցվել են նոր բնակելի թաղամասեր, որտեղ ապրում են միջին խավի պորտուգալացիներ, որոնցից շատերը սարսափում էին ափամերձ շրջանի բնակարանային գներից:

Փոքրիկ, նեղ ճանապարհի վերջում, որտեղ ֆուտբոլիստի տունն էր, այժմ ազատ հողակտոր է՝ առատ թփուտներով, ֆուտբոլային փոքր դաշտ և բար: Բայց երկրպագուները լավ էլ գտնում են տան տեղը. տաքսիստները մի քանի եվրոյի դիմաց էքսկուրսիա են կազմակերպում՝ ցույց տալով տունը, որտեղ նա մեծացել է, դպրոցը, որտեղ առաջին անգամ սկսել է ֆուտբոլ խաղալ... Պորտուգալացիների հավաքական պատկերացումներում Ռոնալդուն ստվերում է թողել Մադեյրա այցելած այնպիսի հռչակավոր անձանց, ինչպիսիք են Ուինսթոն Չերչիլը, Ավստրիայի կայսրուհի Էլիզաբեթ Սիսին, Ավստրիայի կայսր Կարլ I-ը, Ջորջ Բեռնարդ Շոուն, Ռիլկեն, Քրիստափոր Կոլումբոսը և Նապոլեոնը:

Մադեյրան Ատլանտյան կղզեխումբ է՝ Լիսաբոնից 860 կմ հեռավորության վրա: Բնակեցված են Մադեյրա և Պորտո Սանտո կղզիները, մյուս երեք փոքրիկ կղզիներում ոչ ոք չի ապրում: Մադեյրա կղզեխումբը, որը զբոսավարները «Ատլանտյան օվկիանոսի պարտեզ» են հռչակել, տարածվում է 57 կմ երկարությամբ և 22 կմ լայնությամբ հրաբխային ապարի վրա: Ամենաբարձր կետը Պիկո Ռիվուն է, որի բարձրությունը ծովի մակարդակից 1862 մ է: Մայրաքաղաքը՝ Ֆունչալը, 110 հազար բնակիչ ունի:

Այստեղ է ծնվել Կրիշտիանու Ռոնալդուն՝ «Կրուզ դե Կարվալիո» հիվանդանոցում: Փետրվարի 5-ն էր, օրը՝ երեքշաբթի, ժամը՝ 10:20: 52 սմ էր, 4 կգ: Նա Մարիա Դոլորես Դոս Սանթոսի և Խոսե Դինիս Ավեյրոյի 4-րդ զավակն էր, Հյուգոյի, Էլմայի

և Կատյայի կրտսեր եղբայրը: Կատյան արդեն 9 տարեկան էր, այնպես որ Դոլորեսի համար սա չպլանավորած հղիություն էր: Եվ այժմ ծագել էր նորածնին անվանակոչելու խնդիրը:

«Քույրս (այդ ժամանակ նա մանկատանն էր աշխատում) ասաց, որ եթե տղա լինի, կարող ենք Կրիշտիանու անվանել, հիշում է Դոլորեսը: - Ես մտածեցի, որ լավ ընտրություն է: Ռոնալդ Ռեյգանից հետո ես և ամուսինս հավանում էինք Ռոնալդու անունը: Քույրս ընտրեց Կրիշտիանուն, մենք՝ Ռոնալդուն»:

Խորհրդանշական է, որ Կրիշտիանու Ռոնալդու Դոս Սանթոս Ավեյրոյի մկրտությունը, որն անցկացվեց Սանտո Անտոնիո եկեղեցում, զուգադիպեց ֆուտբոլային մի իրադարձության հետ: Ազատ ժամանակ Խոսե Դինիսն օգնում էր Սանտո Անտոնիոյի «Անդորինա» սիրողական ֆուտբոլային թիմին, որպես հանդերձանքի պատասխանատու: Թիմի ավագ Ֆեռնանո Բառոշ Սուուզային նա խնդրեց դառնալ իր նորածին երեխայի կնքահայրը: Արարողությունը նախատեսված էր երեկոյան 6-ին, բայց նախքան այդ, ժամը 4-ին, «Անդորինան» պետք է խաղար «Ռիբեյրա Բռավայի» հետ:

Քահանան՝ Անտոնիո Ռոդրիգես Ռեբոլան, նյարդայնանում էր: Նա արդեն մկրտել էր մյուս երեխաներին, բայց լուր չկար ո՛չ հորից, ո՛չ կնքահորից: Դոլորեսն ու կնքամայրը պտտվում էին եկեղեցու շուրջ՝ փորձելով հանգստացնել քահանային: Ֆեռնանոն ու Դինիսը կես ժամ ուշացումով ժամանեցին, և արարողությունը վերջապես սկսվեց:

Ընտանեկան ալբոմի առաջին լուսանկարներում Կրիշտիանու Ռոնալդուն իր խոշոր աչքերով նայում է ուղիղ ֆոտոխցիկին: Նա կապույտ և սպիտակ շորերով է, սպիտակ կոշիկներով, երկու դաստակներին՝ ոսկե թևնոցներ, մատին՝ ոսկե մատանի,

պարանոցին՝ երկար շղթայով խաչ: Մեծանալուն զուգընթաց լուսանկարներում նրա մազերը գանգրանում են, ժպիտը դառնում է ավելի բաց, երբ կորցնում է առջևի ատամները:

Դինիսն այգեպան էր քաղաքապետարանում, Դոլորեսը խոհարարություն էր անում, որ կարողանա ուտելիք հասցնել իր երեխաներին: 20-ամյա Դոլորեսը հազարավոր պորտուգալացիների պես արտագաղթել էր Ֆրանսիա, որտեղ երեք ամիս հավաքարար էր աշխատել: Ամուսինը պատրաստվում էր միանալ նրան, բայց չկարողացավ, և Դոլորեսը վերադարձավ Մադեյրա: Նրանք արդեն երկու երեխա ունեին:

Կյանքը հեշտ չէր Ավեյրոների ընտանիքի համար: Այն դըժվար էր բոլորի համար, ովքեր հեռու էին առափնյան զավթած հյուրանոցային բիզնեսից: 6-հոգանոց ընտանիքն ապրում էր փոքրիկ տանը, որն անձրևի ժամանակ թրջվում էր տասնյակ անցքերից թափվող ջրերից: Դոլորեսը քաղաքապետարանից աղյուս ու շաղախ էր բերում՝ փորձելով փակել անցքերը:

Բայց Կրիշտիանուի համար դա երջանիկ մանկության շրջանն էր: 2-3 տարեկանում, սկսելով խաղալ բակում կամ Լոմբինյո փողոցում, նա բացահայտեց իր լավագույն ընկերոջը՝ ֆուտբոլը:

«Սուրբ Ծննդյան տոնին ես նրան խաղալիք նվիրեցի՝ հեռակառավարվող մեքենա: Մտածում էի՝ դա նրան կզբաղեցնի, հիշում է նրա կնքահայր Ֆեռնաո Սոուզան: – Բայց երեխան նախընտրեց ֆուտբոլ խաղալը: Քնում էր իր գնդակի հետ, երբեք ձեռքից բաց չէր թողնում: Գնդակը միշտ թևի տակ էր: Ուր էլ գնար, հետը տանում էր»:

Կրիշտիանուն հաճախում էր էստեռնատո դե Սաո Ժոաո դա Ռիբեիրայի մանկապարտեզը, որը տնօրինում էին ֆրանցիս-

կյան միանձնուհիները*։ Վեց տարեկանում նա ընդունվում է տեղի տարրական դպրոց։ Միջնակարգը շարունակում է Գոնչավետա Զառկո դպրոցում, որը «Բառեյրո» ստադիոնին մոտիկ լինելու պատճառով առավել հայտնի է որպես Բառեյրո դպրոց։ Այդ ստադիոնում իր հանդիպումներն է անցկացնում պորտուգալական հանրահայտ «Մարիտիմո» ֆուտբոլային ակումբը։ Կրիշտիանուն սովորող տեսակ չէր։ Ծույլիկ չէր, բայց գիրք կրճող էլ չէր։ Եվ երջանիկ էր իր միջակ գնահատականներով։

Նրա ուսուցիչ Մարիա դոս Սանթոնն իր նախկին աշակերտին հիշում է որպես բարեկիրթ, ուրախ երիտասարդի և դասընկերների համար լավ ընկերոջ։ Երբ նրան հարցրեցին, թե որն էր Կրիշտիանուի սիրելի զբաղմունքը, պատասխանեց. «Այս դրոներից դուրս ֆուտբոլը նրա համար ամեն ինչ էր։ Նա այլ զբաղմունքներ էլ ուներ՝ երգեր էր սովորում, տնայիններն անում, բայց սիրում էր ժամանակ գտնել հատկապես ֆուտբոլի համար։ Երբ իսկական գնդակ չէր լինում (և հաճախ իսկապես չէր լինում), Կրիշտիանուն գնդակ սարքում էր իր գուլպաներից։ Նա միշտ ժամանակ էր գտնում խաղահրապարակում ֆուտբոլ խաղալու համար։ Չգիտեմ, թե ինչպես էր կարողանում դա անել»։

Ֆուտբոլ խաղում էր և՛ խաղադաշտում, և՛ փողոցում։ «Երբ դպրոցից տուն էր գալիս, սովորաբար ուղարկում էի իր սենյակ դաս սովորելու, - պատմում է Դոլորեսը, - միշտ ասում էր, որ դաս չունի։ Ես գնում էի ճաշ եփելու, իսկ ինքն առիթը բաց չէր թողնում։ Պատուհանից դուրս էր ցատկում՝ հետը յոգուրտ կամ միրգ վերցնելով, գնդակը թևի տակ էր դնում ու փախչում։ Խաղում էր մինչև երեկոյան ինն անց կես»։

* The Franciscan Sisters of Christian Charity – Ֆրանցիսկյան քույրերի քրիստոնեական բարեգործական միությունը կաթոլիկ կանայք հիմնել են 1869-ին։

Դա կարծես բավարար չէր, և նա սկսեց բաց թողնել դասերն ու ֆուտբոլ խաղալ: «Ուսուցիչներն ասում էին, որ պետք է պատժել նրան, սակայն երբեք չեմ արել դա: Նա պետք է շատ մարզվեր՝ ֆուտբոլային աստղ դառնալու համար»: Ռոնալդուն էլ հետագայում խոստովանում էր. «Ես միշտ ֆուտբոլ էի խաղում ընկերներիս հետ: Դա այն էր, ինչ սիրում էի անել: Այդպես էի անցկացնում ժամանակս»:

Նա խաղում էր փողոցում, որովհետև մոտակայքում ֆուտբոլի դաշտ չկար: Հատկապես դժվար էր Քվինտա դե Ֆալկաո փողոցում խաղալը, քանի որ այստեղով հաճախ ավտոբուսներ, մեքենաներ և մոտոցիկլետներ էին անցնում: Երեխաները ստիպված էին լինում ամեն անգամ հեռացնել դարպասաձողերին փոխարինող քարերը և խաղը վերսկսելու համար սպասել՝ մինչև երթևեկությունը դադարի: Խաղերը կարծես անվերջ բախումներ լինեին շենքերի տղերքի կամ թաղի ընկերների միջև: Դադար էր տրվում միայն այն ժամանակ, երբ գնդակն ընկնում էր հարևանի պարտեզը: Եթե դա պարոն Ագոստինոյի պարտեզն էր, ապա նա սկսում էր սպառնալ, որ կծակի գնդակը, և Դոլորեսին ու մյուս մայրերին զգուշացնում էր, որ իրենց երեխաներին կարգի հրավիրեն:

Կրիշտիանուն ժամերով միայնակ խաղում էր ջրհորի մոտ՝ գնդակը պատին հարվածելով: Ջրհորն ու փողոցը նրա առաջին մարզահրապարակն էին: Հենց այս մայրերի, ասֆալտի ու մեքենաների արանքում, մեծ ու փոքր երեխաների հետ խաղալով, Ռոնալդուն սովորեց այն հնարքներն ու տեխնիկան, որոնք նրան հետագայում դարձրին լավագույններից մեկը՝ դառնալով նրա այցեքարտը: «Նա ամբողջ օրը փողոցում էր անցկացնում՝ իսկական հնարքներ բանեցնելով գրն-

դակով, որը կարծես նրա ոտքին կպած լիներ», - վերհիշում է Ադելինո Անդրադեն՝ Ավելյրո ընտանիքի հարևանը:

«Երբ գործը հասնում էր ֆուտբոլին, նա ցուցադրում էր իր ամբողջ ձիրքը, - պատմում է Կրիշտիանուի քույրը՝ Էլման: - Բայց մեր մտքով էլ չէր անցնում, որ նա այսքան առաջ կգնա»:

Ֆուտբոլի աշխարհում Կրիշտիանուն առաջին քայլն արեց 6 տարեկանում: Նրա զարմիկ Նունոն խաղում էր «Անդորինայում», և Կրիշտիանուն խաղադաշտում մի քանի անգամ արդեն եղել էր հոր հետ: Մի անգամ Նունոն նրան հրավիրեց իր խաղը դիտելու և հարցրեց՝ ցանկանո՞ւմ է խաղալ որևէ թիմի կազմում: Կրիշտիանուն որոշեց միանալ մարզումներին և փորձել: Դոլորեսը և Դինիսն ուրախ էին կրտսեր որդու որոշման համար, քանի որ իրենք էլ միշտ սիրել են ֆուտբոլ: Դինիսը և իր ավագ որդի Հյուգոն «Բենֆիկայի» երկրպագուներ էին, մինչդեռ Դոլորեսը պաշտում էր Լուիշ Ֆիգուին* և Լիսաբոնի «Սպորտինգ» թիմը:

1994-95 թթ. մրցաշրջանում 9-ամյա Կրիշտիանու Ռոնալդու դոս Սանտոս Ավելյրոն Ֆունչալի ֆուտբոլային ասոցիացիայից ստանում է իր առաջին մարզական արտոնագիրը՝ N 17182-ը, և սկսում է կրել «Անդորինայի» բաց կապույտ մարզազգեստը: «Անդորինան» երկար պատմություն ունեցող տեղական ֆուտբոլային ակումբ է, որը հիմնադրվել է 1925 թ.

* Luís Filipe Madeira Caeiro Figo - Լուիշ Ֆիլիպե Մադեյրա Ֆիգու (ծնվ. 1972 թ.), Պորտուգալիայի բոլոր ժամանակների լավագույն ֆուտբոլիստներից մեկը: Խաղացել է որպես կիսապաշտպան: Եղել է «Բարսելոնա» ֆուտբոլային ակումբի թիմի առաջին օտարազգի ավագը, ՖԻՖԱ-ի վարկածով աշխարհի լավագույն ֆուտբոլիստը (2001), «Ոսկե գնդակի» դափնեկիր (2000), Եվրոպայի առաջնության արծաթե (2004) և բրոնզե (2000) մեդալակիր: 127 անգամ խաղացել է Պորտուգալիայի հավաքականի կազմում. սա ռեկորդ էր, որ Կրիշտիանու Ռոնալդուն ավելի ուշ կգերազանցի:

մայիսի 6-ին: Անդորինա պորտուգալերեն նշանակում է ծիծեռ-նակ: Ըստ ավանդույթի՝ ակումբն այդպես է կոչվել, քանի որ մի ֆուտբոլիստի հոյակապ գոլին հաջորդել է ծիծեռնակի սլացքը:

Տարրական դպրոցի ուսուցիչ Ֆրանսիսկո Աֆոնսոն, որը դասավանդում էր Կրիշտիանուի քույր Կատյային, Մադեյրայի երիտասարդական լիգայում 25 տարի զբաղվել է մարզչական գործունեությամբ: Նա Ռոնալդուի առաջին մարզիչն է և երբեք չի մոռանա, թե ինչպես առաջին անգամ յոթ տարեկան տղային տեսավ «Անդորինայի» ստադիոնում:

«Կրիշտիանուն ապրում էր ֆուտբոլի համար,- հիշում է նա: - Արագաշարժ էր, տեխնիկապես անգերազանցելի և հավասարապես լավ էր խաղում թե՛ աջ ոտքով, թե՛ ձախ: Նիհար էր, սակայն իր տարեկիցներից մի գլուխ բարձր: Տղան, անկասկած, չափազանց շնորհալի էր, գեներով եկող բնատուր տաղանդ ուներ: Նա միշտ ընկած էր գնդակի ետևից: Հենց ինքը պիտի լիներ խաղն ավարտողը: Շատ կենտրոնացած էր և աշխատում էր քրտնաջան՝ անկախ նրանից, թե դաշտի որ հատվածում էր խաղում: Խորապես վշտանում էր, երբ չէր կարողանում խաղալ կամ բաց էր թողնում խաղը»:

Ակումբի նախագահ Ռուի Սանթոսը մի զվարճալի դեպք է հիշում, որը եղել է 1993-94 թթ. մրցաշրջանի ֆուտբոլային հանդիպմանը: «Անդորինան» խաղում էր ընդդեմ «Կամաչայի», որն այդ ժամանակ կղզու ամենաուժեղ թիմերից մեկն էր: Երկրորդ խաղակեսում «Անդորինան» պարտվում է 0:2 հաշվով, և Ռոնալդուն այնքան է տխրում, որ հեկեկում է մի երեխայի նման, որից կարծես իր սիրած խաղալիքն էին խլել: 2-րդ խաղակեսին նա խաղադաշտ է դուրս գալիս և երկու գնդակ է խփում՝ թիմին հաղթանակ պարգևելով 3:2 հաշվով:

Նա չի սիրում պարտվել: Ուզում է հաղթել ամեն անգամ: Իսկ երբ թիմը պարտվում է, Ռոնալդուն արտասվում է»:

«Ահա թե որտեղից է առաջացել նրա մականունը՝ լացկան երեխա», - բացատրում է Դոլորեսը: - Նա հեշտությամբ լալիս էր ու բարկանում, երբ թիմակիցն իրեն չէր փոխանցում գնդակը, կամ երբ թիմն իր ուզած ձևով չէր խաղում»: Մեկ այլ մականուն էլ էր ստացել՝ *Արելինա*, այսինքն՝ փոքր մեղու, քանի որ երբեք կանգ չէր առնում: Ժրաջան մեղվի նման նա միշտ զիգզագաձև վազվզում էր դաշտում: Տարիներ անց Մադրիդում, Կրիշտիանուն նույն անունով էր կնքելու իր յորկշիրյան տերյեր ցեղատեսակի շանը:

«Ռոնալդուի նման ֆուտբոլիստի ամեն օր չես հանդիպի, - հավելում է Ռուի Սանթոսը: - Իսկ երբ հանդիպում ես, հասկանում ես, որ նա գերասող է, որը տարբերվում է ֆուտբոլ խաղացող մնացած բոլոր երեխաներից»: Դժբախտաբար, «Անդորինան» լիգայի ամենաթույլ թիմերից մեկն էր և, երբ հանդիպում էր «Մարիտիմոյի», «Կամարա դը Լորոսի» կամ «Մաչիկոյի» հետ, միշտ չոր հաշվով տանուլ էր տալիս: Ռոնալդուն չէր ցանկանում խաղալ, քանի որ նախապես գիտեր, որ պարտվելու էին: Սակայն ամեն անգամ հայրը տուն էր գալիս, նրան քաջալերում էր, համոզում հագնել մարզահագուստն ու մարզակոշիկները և թիմի հետ խաղադաշտ դուրս գալ: «Միայն թույլերն են հանձնվում», - ասում էր նա: Այս խոսքը Ռոնալդուն երբեք չնոռացավ:

Կարճ ժամանակ անց նրա անունը հայտնի դարձավ ամբողջ կղզում: Կղզու երկու մեծ ակումբները՝ «Նասիոնալ դե Մադեյրան» և «Մարիտիմոն», սկսեցին հետաքրքրվել փոքր մեղվով: Գնդակի հետ վարվել իմացող երեխայի մասին լու-

րերը հասան Ֆեռնանո Սոուզային՝ Կրիշտիանուի կնքահորը, որն այդ ժամանակ «Նասիոնալ դե Մադեյրա» պատանեկան թիմի մարզիչն էր: «Ինձ համար հաճելի բացահայտում էր, որ տղան, որի մասին այդքան խոսում էին, հենց իմ սանիկն է,- պատմում է նա: - Գիտեի, որ նա ֆուտբոլ է խաղում, բայց պատկերացում անգամ չունեի, որ այդքան լավ է խաղում: Նա մյուսներից անհամեմատ առաջ էր անցել: Գնդակի հետ գեղեցիկ էր վարվում և, անկասկած, մեծ ապագա էր ունենալու: Ես անմիջապես հասկացա, որ այդ երեխան Աստծո պարգև էր իր ընտանիքի համար»: Առանց երկմտելու Սոուզան տղային տարավ «Նասիոնալ»: «Խոսեցի մոր հետ, բացատրեցի, որ դա նրա համար լավագույն տարբերակն է, «Անդորինայի» հետ էլ համաձայնության եկանք»:

Սակայն ամեն ինչ այնքան հեշտ չէր, որքան Սոուզան է ներկայացնում: Դինիսը նախընտրում էր, որ իր տղան խաղա «Մարիտիմոյում»: Ակումբի պատմական «Ալմիրանտե Ռեյիս» խաղադաշտը մոտ էր հայրական տանը: Բացի դրանից տղային դուր էր գալիս կանաչ ու կարմիր մարզահագուստը*, նա սիրում էր «Մարիտիմոն»: Համաձայնության չգալով Ռուի Սանթոսը հանդիպում է կազմակերպում երկու ակումբների հետ՝ հնարավոր առաջարկները քննարկելու համար, սակայն «Մարիտիմոյի» պատանեկան թիմի մարզիչը չի գալիս «Անդորինայի» նախագահի հետ հանդիպմանը: Մնում էր Կրիշտիանուին ուղարկել «Նասիոնալ» ակումբ՝ 20 գնդակի և պատանեկան թիմի համար 2 զույգ մարզահագուստի դիմաց:

Գործարքն այդ ժամանակ արժեքավոր չէր, սակայն հետագայում «Անդորինան» պատմության մեջ պետք է մտներ

* «Մարիտիմո» ակումբի խորհրդանիշի, մարզաշապիկի գույներն են:

որպես «Ոսկե գնդակ» նվաճող առաջին ակումբ և ֆինանսավորում ստանար քաղաքապետարանից: Հին խաղաղաշտի հողե հարթությունն այժմ փոխարինվել է արհեստական ծածկով և շրջապատվել հսկայական լապտերներով: Սակայն սա ամենը չէ: «Նասիոնալի» հետ գործարքն ամրագրվել է Մադեյրայի պատմության գրքերում ճիշտ այնպես, ինչպես Ռաուլի* տեղափոխվելը Մադրիդի «Ատլետիկոյից» Մադրիդի «Ռեալ» հայտնի դարձավ ամբողջ Մադրիդում միայն այն պատճառով (ըստ լուրերի), որ կարմիր ու սպիտակ մարզահագուստ** կրող ակումբը չէր ցանկանում վճարել տղայի ուղեվարձը, որպեսզի նա կարողանար մարզումների հաճախել:

Կրիշտիանուն ընդամենը 10 տարեկան էր, երբ միացավ «Նասիոնալ» ակումբին: Մայրը խիստ մտահոգ էր. «Ամուսինս միշտ նրան հորդորում էր խաղալ իրենից տարիքով մեծ երեխաների հետ: Ես անհանգստանում էի, որ նա կարող է վնասվածք ստանալ, ոտքը կոտրել, բայց Դինիսը միշտ ասում էր. «Մի՛ անհանգստացիր, նրա հետևից հասնել չեն կարող, նա չափազանց արագաշարժ է»:

Ռոնալդուի փոքր-ինչ նիհար և ոսկրոտ լինելը չէր կարող վրիպել «Նասիոնալի» մարզիչների ուշադրությունից: Նրանք անմիջապես խորհուրդ տվեցին ավելի շատ ուտել՝ մի քիչ քաշ հավաքելու համար: Սակայն տղայի հմտություններին մարզիչներն ամենևին չէին կասկածում: «Անմիջապես նկատելի էր, որ նա ֆանտաստիկ է, - պատմում է Անտոնիո Մենդոսան,

* Raúl González Blanco - Ռաուլ Գոնսալեզ Բլանկո (ծնվ. 1977 թ.), Իսպանիայի հավաքականի և Մադրիդի «Ռեալի» հանրահայտ ֆուտբոլիստ, Չեմպիոնների լիգայի եռակի հաղթող (1998, 2000, 2002):

** Մադրիդի «Ատլետիկոյի» մարզաշապիկի գույներն են:

որը Կրիշտիանուի մարզիչն էր առաջին երկու մրցաշրջաններում, երբ նա խաղում էր սև ու սպիտակ մարզահագուստով: Արդեն զարգացած էին նրա կարողությունները՝ արագությունը, դրիբլինգը, գնդակին հարվածելու տեխնիկան, կատարողական վարպետությունը: Փողոցում ֆուտբոլ խաղալը նրան սովորեցրել էր խուսափել հարվածներից, շրջանցել մրցակիցներին և չվախենալ տղաներից, որոնք իրենից շատ ավելի մարմնեղ էին: Կոփվել էր նաև բնավորությունը, այժմ նա չափազանց խիզախ էր»:

Հիմա Մենդոսան և մյուս մարզիչները պետք է նրան օգնեին հասկանալ, որ ֆուտբոլը թիմային մարզաձև է: Ռոնալդուն կարող էր գնդակը խաղադաշտի իր կեսից գլորելով հասցնել մինչև մրցակցի դարպաս և գոլ խփել՝ գնդակը չփոխանցելով իր թիմակցին: Մրցակիցները նրան չէին անհանգստացնում: Պարտվելը տարբերակ չէր, նա ուզում էր ամեն տեղ հաղթող լինել: Նա լալիս էր ու բարկանում թիմակիցների վրա, երբ ինչ-որ բան այնպես չէր ստացվում: «Նրանք համակերպվում էին ամեն ինչի հետ, որովհետև շատ գոլ էր խփում, - պատմում է Մենդոսան: - Կարողացանք հաղթանակ տանել բոլոր հանդիպումներում 9:0 կամ 10:0 հաշիվներով»: Սակայն Ռոնալդուի ինքնահավանությունն ու գոռոզությունը խանգարում էին: Նա իրեն մյուսներից վեր էր դասում, և դժվար էր նրան որևէ խորհուրդ տալ. դա պետք էր անել առանձին, թիմակիցներից հեռու:

1995-96 թթ. մրցաշրջանում Կրիշտիանուն «Նասիոնալի» կազմում իր առաջին տարածաշրջանային տիտղոսը նվաճեց 10-12 տարեկանների լիգայում: «Պորտուն», «Բոավիշտան» և «ուղղանկյան» (այդպես են կոչու բնակիչները կոչում Պոր-

տուգալիայի մայրցամաքային մասը) բոլոր մյուս մեծ ակումբները սկսեցին հետաքրքրվել նրանով:

Ֆեռնան Սուուզան կարծում էր, որ արդարացի կլիներ իր սանիկին թույլ տալ վճռական քայլ անել: Նա կրկին կապվեց մի մարդու հետ, որը փոխելու էր տղայի ապագան: Այդ մարդը Խոաո Մարկես Ֆրեյտասն էր, մարզի գլխավոր դատախազի օգնականը և Ֆունչալի «Սպորտինգ» ակումբի նախագահը: Հենց նա կանաչ ու սպիտակ մարզահագուստ կրող ակումբի ղեկավարությանը պատմեց այս անհավատալի տղայի մասին Քվինտա դե Ֆալկաոյից: «Սպորտինգ» ակումբը բանագնաց ուղարկեց տղայի ընտանիքի հետ խոսելու նպատակով, և Ռոնալդուն կարճ ժամանակ անց հրաժեշտ տվեց իր մանկությանը, ընտանիքին, ընկերներին և հարազատ կղզուն: Ժամանակն էր ճանապարհի հարթելու դեպի մայրցամաք: